

四庫全書

史部

欽定四庫全書

元和郡縣志卷二十四

唐 李吉甫 撰

山南道

案唐書地理志山南東道有金州次郢州後即漢陰郡其縣曰西城洵陽石泉

漢陰元和時其名不改今志文皆缺

郢州 富水下

開元戶五千六百九十九  
元和戶一萬一千九

鄉一十二  
鄉二十三

本江夏郡雲杜縣之地周地圖記曰蠻人酋渠田金生

代居此地常為邊患梁普通末遣郢州刺史元樹討平之因置新州後魏廢帝二年改為溫州因溫水為名也隋末廢溫州縣並入安陸郡武德四年于今京山縣重置溫州貞觀十七年廢溫州于長壽改置郢州

州境

案州境里數傳寫缺

八到

西北至上都一千三百八十五里  
西北至東都一千一百二十五里

東南至復州三百里

正南微西至江陵府三百里

西北至襄州三百一十里

東北至隨州三百九十里

貢賦

開元貢

賦

白紵布  
布麻

管縣三

長壽 京山 富水

長壽縣

上郭下

本漢竟陵縣地宋分置長壽縣理石城即今縣理是也  
屬竟陵郡魏文帝大統後屬溫州貞觀十七年于縣改  
置郢州縣屬焉後遂因之

漢水去縣十步

縣城本古之石城背山臨漢水吳于此置牙門戍城羊祜鎮荊州亦置戍焉即今州理是也

京山縣

下西至州一百六十里

本漢雲杜縣地也隋屬溫州大業二年改為京山縣皇朝溫州所理在此貞觀十七年罷溫州縣屬郢州

大洪山在縣西北二百里孤秀為衆山之傑其山多鍾乳

溫湯水在縣南十五里擁以溉田其收數倍流經其家

多凶

富水縣

中西南至州三百四十里

本漢安陸縣地後漢分其地置新市縣屬江夏郡後漢有新市平林兵謂此後魏改新市為富水縣取縣界富水為名

富水南去縣一百步

唐州

淮安上

開元戶二萬一千五百九十七  
元和戶四萬七百四十

鄉四十五  
鄉八十七

禹貢豫州之域春秋時為楚地秦為南陽郡地自漢迄宋皆同後魏太和中于此置東荊州理比陽故地其後改為淮州隋開皇五年又改為顯州貞觀九年改為唐州

州境

東西三百八里  
南北三百十里

八到

西北至上都取葉縣路一千三百四十里取鄧州  
路一千二百二十五里

西北至東都五百二十里  
東至蔡州二百四十里

東南至申州二百六十里  
南至隨州三百六十里

西至鄧州三百二十里

西北至襄州三百二十里

北至汝州葉縣一百八十里自葉取龍興路至汝州一百八十里

東北至許州二百七十里

貢賦

開元貢

絹絲布

賦

布麻

元和貢

絹十疋

管縣七

比陽 慈丘 桐柏 平氏 湖陽 方城

泌陽





比陽縣

上郭下

本漢舊縣屬南陽郡比水所出故曰比陽後魏屬江夏郡隋屬淮安郡貞觀改屬唐州

顯望岡在縣西北六十里

比水南去縣二里後漢世祖破甄阜梁丘賜于比水西

斬之即此水也

案是書因避唐太宗諱凡世字皆作代今過後漢世祖之稱改從史文

舞陰故城在縣西北六十五里漢縣屬南陽郡曹公與張繡戰引還舞陰即此城也

慈丘縣 上西南至州七十里

本漢比陽縣之地後魏孝文于此置江夏縣并置江夏郡領之隋開皇三年廢郡縣屬淮州十八年改為慈丘取慈丘山為名

慈丘山在縣西五十里

比水出縣東南太湖山

桐柏縣 中西北至州一百二十里

漢平氏縣之東界也梁于此置義鄉縣隋開皇十八年

改為桐柏取山為名也

桐柏山在縣西南九十里禹貢曰導淮自桐柏出紫草  
天木山俗名天目山在縣東北五十五里祖逖為豫州  
刺史藏家口于天木山即此山也山上有池時人號為  
天目

淮水出縣南桐柏山一名大復山

淮瀆廟在縣西六十里桐柏山東北

平氏縣 中東北至州七十里

本漢舊縣屬南陽郡晉屬義陽郡其後為北人侵掠縣  
皆丘墟後魏于平氏故城重置屬淮州隋改屬淮安郡  
貞觀改屬唐州

醴水出縣東南桐柏山西流經縣北三里與淮同導西  
流為醴東流為淮

湖陽縣

中東北至州一百六十里

古蓼國也左傳曰鄖人將與隨絞州蓼伐楚注曰今義  
陽東湖陽縣是也地理志曰蓼國咎繇後為楚所滅後

魏孝莊帝于此立湖州貞觀元年廢以湖陽屬唐州

方城縣

上東南至州一百六十里

本漢堵

音者

陽地也屬南陽郡在堵水之陽故名後漢朱

祐為堵陽侯梁于此置堵陽郡隋改置方城縣取方城  
山為名也屬清陽郡貞觀改屬唐州

方城山在縣東北五十里即沮溺耦耕處左傳屈完對  
齊桓公楚國方城以為城是也

堵水西去縣三十五里

泌陽縣

中東至州一百里

本漢棘陽縣地後魏于此置襄城郡領襄城上馬二縣  
貞觀元年廢入湖陽縣開元十三年刺史白知節奏復  
置天寶元年改為泌陽

隨州

漢東上

開元戶一萬三千二百一十六  
元和戶一萬二千七百一十六

鄉二十七  
案鄉數傳寫缺

本春秋時隨國與周同姓左傳曰漢東之國隨為大注  
曰今義陽隨縣也其後為楚所滅為南陽郡地漢立為

隨縣屬南陽郡晉太康九年分義陽置隨郡自宋以還多以封建子弟為王後魏文帝大統十六年改隨州後遂因之

州境

東西三百七十里

南北三百七十八里

八到

西北至上都一千四百三里

西北至東都一千一百六十五里

東南至安州一百五十五里

西南至郢州三百九十里

西至襄州三百五十里

西至唐州三百六十里

東北至申州二百四十里

貢賦

開元貢賦

綾絹

葛布

覆盆子

元和貢

綾十疋

葛五疋

管縣四

隨

光化

棗陽

唐城

隨縣

上郭下

本漢舊縣屬南陽郡即隨國城也歷代不改

厲山亦名烈山在縣北百里禮記曰厲山氏炎帝也起

于厲山故曰厲山氏



斷蛇丘在縣北二十五里即隨侯救斷蛇處

澁水在縣西四十里左傳曰楚武王伐隨莫敖屈重除道梁澁

平林故城在縣東北八十里王莽末關東起兵陳牧廖堪起兵號平林兵

季梁廟在縣南門外道西三十二步

光化縣 下西北至州三十四里

本漢隨縣地南齊武帝分其地立安化縣屬隨郡後魏

文帝改為新化縣廢帝改為光化縣

棗陽縣

上東至州二百里

本漢蔡陽地屬南陽郡後漢分蔡陽立襄鄉縣周改為廣昌隋仁壽元年改為棗陽縣因棗陽村為名也

春陵故城在縣東南三十五里漢景帝子長沙王發子春陵節侯之邑也世祖即位幸春陵復其徭役改曰章

陵

案此條及下二條世祖原本因避諱皆作代祖今改正

後漢世祖宅在縣東南三十里宅南三里有白水東京

賦所謂龍飛白水也

世祖父南頓君陵縣東二十七里

唐城縣

上東南至州一百五里

本漢隨縣地梁于此置下澁戍後沒魏改為下澁鎮隋開皇三年改鎮為唐城縣大業二年廢開元二十四年採訪使宋鼎奏置

唐城山在縣北三十二里

均州

武當下

開元戶九千八百五十九  
元和戶八千一百八十二

鄉二十  
鄉二十

漢南陽郡武當縣地也因山為名永嘉之亂雍州始平  
郡流人出在襄陽者江左因僑立始平郡以領之寄理  
襄陽宋孝武帝割武當縣以隸之後魏改始平郡為武  
當郡隋開皇三年罷郡置均州

州境

案州境里  
數傳寫缺

八到

西北至上都九百里  
東北至東都八百八十五里

東至鄧州二百四十里  
東南水路至襄州三百六十里

南至房州二百六十八里

西至金州三百六十里

北至鄧州內鄉縣二百三十里

貢賦

開元貢

麝香

山雞皮毛

賦

絹

布

縣

麻

管縣三

武當 鄖鄉 豐利

武當縣

上郭下

本漢舊縣屬南陽郡後漢初延岑起兵于此後遂空廢  
宋元嘉末移縣理延岑城貞觀十五年于此置均州

武當山一名峯山一名太和山在縣南八十里高二千五百丈周迴五百里乃陰長生于此得仙

漢水去縣西北四十里水中有洲名滄浪洲即禹貢云又東為滄浪之水

鹽池在縣東南百里池水四周上生紫氣池左右草木十餘里氣所染著上如雪霜嘗之鹽味土人謂之鹽花  
鄖鄉縣 上東至州一百一十三里

本漢錫縣

錫音羊

古麋國之地也左氏傳曰楚潘崇伐麋

至于錫穴是也漢錫縣屬漢中郡晉武帝改錫縣為鄖鄉縣隋初屬均州後隸房州貞觀又改屬均州

西山今名寶蓋山在縣西南三里其山南臨漢水

漢水西自豐利縣界流入南去縣三里東有澇灘冬即水淺而下多大石又東為淨灘夏水急迅行旅苦之歌曰冬澇夏淨斷官使命

豐利縣 東至州二百四十里

本漢長利縣之地也理在長利川故以為名宋于此僑

置南上洛郡屬梁州後魏文帝改南上洛郡為豐利郡  
又立豐利縣隋以豐利縣屬金州貞觀八年改屬均州  
錫義山一名天心山在縣東北六十五里山方圓百里  
形如城四面有門相傳以為仙靈所居

漢水南去縣二十里

房州 房陵下

開元戶一萬四千四百三十一

鄉三十四

元和戶四千四百

鄉三十四

禹貢梁州之域古麋國之地左傳曰楚子伐麋成大心



敗麋師于防渚關駟以為防陵即春秋時防渚州之得名蓋自此也戰國時屬楚秦為漢中郡地漢立房陵縣屬漢中郡後漢末立為房陵郡建安三十四年蜀先主遣宜都太守孟達征房陵殺太守申耽魏文帝時孟達降魏魏改房陵郡為新城郡後達叛魏降蜀司馬宣王擊殺之侯景之亂地入後魏至周武帝改為遷州貞觀十年廢遷州自竹山縣移房州于廢遷州廨即今州理是也

州境

東西五百二十三里  
南北三百六十九里

八到

西北至上都一千六百六十八里  
東北至東都一千一百五十五里

東至襄州四百二十里水路五百八十四里  
南至歸州山路五百里

正西微北至金州五百四十里  
北至均州二百六十八里

貢賦

開元貢賦

麝香 蠟 布 麻

鍾乳 蒼礬石

元和貢

麝香二十顆

石膏

雷丸

芮草

管縣四

房陵 永清 竹山 上庸

房陵縣上郭下

本漢舊縣屬漢中郡後漢改防為房後魏以為光遷縣貞觀十年改為房陵

房山在縣西南四十三里其山西南有石室似房因為名

建鼓山在縣南百一十三里與馬駿山連接二山並高峻冬夏積雪

筑水出縣西北葉山經縣北二里魏遣夏侯泉與張郃

下巴西集軍宕渠劉備屯軍筑口即此水也

趙王遷墓在縣北九里秦使王翦滅趙徙趙王遷于房陵

永清縣 中下西至州一百一十里

本房陵縣地後魏廢帝分房陵東境置大洪縣周武帝改為永清縣屬遷州隋改屬房陵郡

沮水出縣西南景山東南入于漢江左傳曰江漢沮漳

楚之望也

案沮今左傳本作睢孔穎達疏云睢經襄陽至南郡枝江縣入江與山海經睢水出景山

相合漢書地理志臨沮注引左傳作沮與水經沮水出房陵縣相合沮睢二字舊蓋通用

筑水經縣北三里

大洪故縣城在縣東六里

竹山縣

中下東至州一百四十八里

本漢上庸縣古庸國也昔武王伐紂庸人往焉故牧誓云及庸蜀羌髳微盧彭濮人注云庸濮在江漢之南左傳曰庸率羣蠻以叛楚使廬戢黎侵庸後遂滅之至漢初立上庸縣屬漢中郡後漢于縣立上庸郡後魏改置

竹山縣因黃竹嶺以為名也

方城山在縣東南三十里頂上平坦四面險固山南有城周十餘里

白馬塞山在縣西南三十五里初孟達為新城太守登此山而歎曰劉封申耽據金城千里而不能守豈大丈夫也

黃竹山在縣北百里山上竹色皆黃因以為名也

上庸縣 中下東至州二百五十里

本漢上庸縣地也按漢上庸縣今竹山縣理是也蕭齊武帝分上庸縣地于此立新豐縣屬上庸郡後魏改為孔陽縣因界內孔陽水為名隋開皇三年罷孔陽縣仍移上庸縣理于廢孔陽縣理屬羅州貞觀十年改屬房州

長羅山在縣北四里

孔陽水在縣西五十步

元和郡縣志卷二十四

欽定四庫全書

史部

元和郡縣志卷二十五

六五

詳校官編修

臣曹

城

檢討

臣

德

生

覆

勘

總校官庶吉士

臣

倉

聖

脉

校對官助教

臣

蔡

鎮

謄錄監生

臣

羅

善

慶



欽定四庫全書

元和郡縣志卷二十五

唐 李吉甫 撰

山南道

三 案唐書地理志山南西道有集州即符陽郡其縣曰難江大年嘉川有壁州即

始寧郡其縣曰通江廣納符陽白石東巴有巴州即清化郡其縣曰清化曾口歸仁始寧其章恩陽

七盤有蓬州即蓬山郡其縣曰蓬池良山儀隴伏虞宕渠蓬山朗池有通州即通川郡其縣曰通川

永穆三岡石鼓東鄉宣漢新寧巴渠閬英有開州即盛山郡其縣曰開江新浦萬歲有閬州即閬中

郡其縣曰閬中晉安南部蒼溪西水奉國新井新政岐坪有果州即南充郡其縣曰南充相如流溪

西充岳池有渠州即潏山郡其縣曰流江渠江潏山此皆缺志文與節度使所管州縣原目不符

興元府

漢中

案戶鄉數傳寫缺

今為山南西道節度使理所

管興元府洋州利州鳳州興州成州文州

扶州集州壁州巴州蓬州通州開州閬州果州渠州管縣八十八案都管戶數傳寫缺

禹貢華陽黑水惟梁州舜十二牧梁其一也春秋時及

戰國並屬楚楚懷王時秦惠文王取漢中地六百里以

為漢中郡秦亡項羽封高祖為漢王高祖欲攻羽蕭何

曰語曰天漢其稱甚美遂從之後漢末張魯據漢中改

漢中為漢寧郡曹公討平之復為漢中郡蜀先主破魏將夏侯妙才遂有其地為重鎮魏延蔣琬姜維相繼屯守其後鍾會既克蜀又置梁州晉末李特據蜀漢中又為所有桓溫討平之譙縱時又失漢中縱滅又歸舊理自漢宋以還多理南鄭隋開皇三年罷郡所領縣並屬梁州大業三年罷州為漢川郡武德元年又改為褒州二十年又為梁州興元元年因德宗遷幸改為興元府按漢中當巴蜀捍蔽故先主初得漢中謂人曰曹公雖

來無能為也及蕭齊明帝時後魏大將元英率兵十萬  
通斜谷圍南鄭刺史蕭懿拒守百餘日不拔而退

府境

東西三百九十九里  
南北四百四十七里

八到

東北至上都七百六十里  
東北至東都一千六十二里

東至洋州一百二十里

西南至利州四百九十里

西取巴嶺路至集州二百八十里

西取斜谷路至鳳州三百八十里

正西微北至興州二百五十里

北取太白山路至鳳翔府六百里

貢賦

開元貢

紅花

布

麻

絹

管縣六

南鄭 褒城 金牛 三泉 城固 西

南鄭縣 次赤郭下

本漢舊縣屬漢中郡幽王為犬戎所滅鄭桓公死之鄭人南奔居此故曰南鄭高祖都之蜀後主以魏延為南鄭侯後魏改為光義縣隋開皇元年又為南鄭

巴嶺在縣南一百九里東傍臨漢江與三峽相接山南即古巴國

漢水經縣去縣一百步禹貢曰嶓冢導漾東流為漢裴秀云漢氏釋淮水改秩漢水為四瀆以其國所氏

褒城縣

次畿東至府三十三里

本漢褒中縣屬漢中郡都尉理之古褒國也當斜大路晉義熙末朱齡石平蜀梁州刺史理此仍改褒中縣魏又于此置褒中郡隋開皇元年以避廟諱改為褒內縣仁壽元年改為褒城

褒水源出縣西衙嶺川斜水與褒水同源而派分

褒水東流

入于漢中郡褒城縣斜水北流入渭  
經武功縣及鳳翔扶風三縣者也  
漢孝武時人欲通

褒斜道及漕事下御史大夫張湯湯問其事因言抵蜀  
從故道多坂迴遠今開褒水至斜間百餘里以車轉從  
斜下渭如此漢中之穀可致山東從沔無限便于砥柱  
之漕且褒斜林木竹箭之饒擬于巴蜀天子然之拜湯  
子卬為漢中守發數萬人作褒斜道五百里道果便近  
而水多湍石不可漕遂止

褒谷山在縣北五里南口為褒北口為斜長四百七十

里

褒國在縣東二百步褒如之所出也

甘亭關在縣北九里今為戍

褒斜道一名石牛道張良令漢王燒絕棧道示無還心  
即此道也諸葛亮與兄瑾書曰前趙子龍退軍燒壞赤  
崖以北閣道緣谷百餘里其閣梁一頭入山腹立柱于  
水今水大而急不可安柱不可強也

金牛縣

次畿東至府一百八十里



本漢葭萌縣地東晉孝武分置縣谷縣武德二年分縣  
谷縣通谷鎮置金牛縣取秦五丁力士石牛出金為名  
嶓冢山縣東二十八里漢水所出

嘉陵江經縣西去縣三十里

故關城俗名張魯城在縣西三十八里

三泉縣

次畿東北至府二百五十里

本漢葭萌縣地蜀先主改為漢壽縣武德四年置南安  
州又置三泉縣八年州廢以縣屬梁州

城固縣

次畿西至府七十二里

本漢舊縣

案前後漢書及晉書俱作成固

有鐵官屬漢中郡隋開皇三

年改屬梁州武德二年改為唐固縣貞觀二年復舊

通關山在縣東北九里漢高祖北定三秦蕭何守漢中

欲修此道通關中故名通關山

漢水南去縣二里

黑水出縣西北太行山南流入漢諸葛亮牋曰朝發南

鄭暮宿黑水

成固故城在縣東六里韓信所築晉平譙縱後梁州刺史嘗理于此也

西縣

次畿西至府一百里

本漢沔陽縣地後魏分置嶠冢隋大業二年改為西縣百牢關在縣西南三十步隋置白馬關後以黎陽有白馬關改名百牢關自京師趣劔南達淮左皆由此也

八陣圖在縣東南十里諸葛亮疊細石為圖

諸葛亮墓在縣東南八里亮卒遺命葬漢中定軍山貞

觀十一年敕禁採樵

定軍山在縣東六十里

洋州 洋川雄

開元戶一萬八千八百八十九  
元和戶二千八百九十六

鄉四十八  
鄉五十二

本漢漢中郡成固縣地先主分成固立南鄉縣為蜀重  
鎮晉改為西鄉縣後魏宣武帝正始中于豐寧戍置豐  
寧郡廢帝于此置洋州因洋水為名隋大業二年廢洋  
州置洋川鎮武德元年復于西鄉立洋州

州境

東西二百九十二里  
南北六百六十里

八到

東北至上都六百四十里  
東北至東都一千四百九十里

東至金州五百里

南至壁州西路五百六十里

西至興元府一百二十里

北至京兆府藍屋縣五百里

貢賦

開元貢賦

白交  
縷  
緇  
絹

火麻布

野紵布

管縣五

興道 黃金 洋源 西鄉 貞符

興道縣

緊郭下

本漢成固縣地後魏宣帝分置興勢縣理在興勢山上  
故以為名武德元年置洋州以縣屬焉貞觀二十三年  
改為興道縣

興勢山在縣北二十里蜀先主遣諸葛亮出駱谷伐興

勢山置烽火樓處處通照即此山按三國時蜀以漢中

建安末破魏將夏侯妙才遂有漢中以魏延後主鎮守其後蔣琬姜維相繼鎮于此即今郡也興勢延熙

七年將軍王平守之魏將曹白帝先主章武元年屯之  
興等攻不克即今興道縣也遂為重鎮後主建興

十五年吳將全琮來攻並為重鎮案雲安郡即夔州地  
不克即今雲安郡也理通釋引元和志白

帝山即州城所據也與赤甲山接初公孫述殿前井有白龍出因號白帝城城周迴七里西南二里因江為池東臨瀼溪惟北一面小差遠迤羊腸數轉然後得上云云今是書于夔州及所管各縣並缺附識于此

漢水經縣南去縣一百步

儻谷一名駱谷在縣北三十里後主延熙二十年諸葛誕反于淮南分關中兵東下姜維欲乘虛向秦川率數萬人出駱谷聞誕已破遂還

駱谷路在今洋州西北二十里州至谷四百二十里晉司馬勲出駱谷破趙戊壁于懸鉤去長安二百里按駱

谷在長安西南南口曰儻谷北口曰駱谷谷中多反鼻蛇青攢音蛇一名焦尾蛇常登竹木上能十數步攢人入中此蛇者即須斷肥去毒不然立死

駱水在縣城西一里

黃金縣

中西南至州一百三十里

本漢安陽縣地屬漢中郡後魏文帝于此分置黃金縣因黃金水為名

黃金水出縣西北百畝山黃金谷南流入經縣西去縣



九里其谷水陸艱險語曰山水艱阻黃金子午魏遣曹  
爽由駱谷伐蜀蜀將王平拒之于興勢山張旗幟至黃  
金谷謂此山也

故鐵城在縣西北八十里城在山上言其險峻故以鐵  
為名昔氐帥楊難當寇漢川令魏興太守薛健據黃金  
戍姜寶據鐵城宋遣梁州刺史蕭思話攻拔之驛即子  
午道也舊道在今金州安康縣界梁將軍王神念以舊  
子午道緣山避水橋梁百數多有毀壞乃別開乾路更

名子午道即此路是也

洋源縣

中西北至州一百二十里

本漢晉西鄉縣武德七年析置洋源縣因洋水以為名

洋水在縣南三百步

西鄉縣

上西北至州一百里

本漢成固縣地蜀先主置南鄉晉武帝改為西鄉縣武

德元年置洋州州理在西鄉後移理興道縣

洋水東去縣八里

貞符縣

中南至州六十里

開元十八年置初名華陽縣天寶三年廢八年王鉞奏開清水谷路復奏置其年鑿山得玉冊因改名貞符縣隸京兆府十一年以路遠改屬洋州

利州

益昌下府

開元戶一萬一千八百八十一  
元和戶二千四百四十四

鄉三十二  
鄉二十七

本秦蜀郡地漢分巴蜀置廣漢郡按今州即廣漢郡之葭萌縣地也蜀先主改葭萌為漢壽縣屬梓潼郡晉改

漢壽為晉壽梁天監以竺肩為太守隨夏侯道遷入後  
魏改立西益州梁大通六年又克之始通劍路改西益  
州為黎州武陵王蕭紀僭號于蜀以席疑為黎州刺史  
疑反州屬魏復改黎州為西益州正始三年改西益州  
為利州隋大業三年改為義成郡武德元年又改為利  
州州城西臨嘉陵江周宣帝大象二年以豆盧勣為利  
州總管至任未幾而王謙據益州叛遣益州刺史達奚  
堪馬步十萬來攻利州于子城南北起土山城內之人

負戶汲援軍既至堪等敗走今大城內東西南北有大池是達奚堪取土處也

州境

東西三百三十里  
南北二百五十里

八到

東至上都一千二百五十里  
東北至東都一千一百一十里

東至集州三百里

西至龍州四百里

西北至文州四百九十里

東北至興元府四百九十里

貢賦

開元貢 乾天門冬 金鋼鐵 絲布  
賦 布 絛 絹

元和貢 芎藭 麝香

管縣五

縣谷 益昌 葭萌 嶺山 景谷

縣谷縣

上郭下

本漢葭萌縣地東晉孝武帝分晉壽縣置興安縣隋開  
皇十八年改為縣谷縣因縣東南縣谷為名

龍門山在縣東北八十二里出好鍾乳

穿山一名胡頭山出好鐵舊置鐵官又有山空鼉伏于  
空處皮可為甲刀箭所不能入

西漢水一名嘉陵水經縣西去縣一里

潛水出縣東北龍門山書曰沱潛既道是也

益昌縣

中下東北至州四十五里

本漢葭萌縣地晉改置晉壽縣周改為益昌縣屬晉壽郡隋改屬利州

晉壽故城在縣東南五十里本漢葭萌縣也按蜀先主自葭萌取成都留中郎將霍峻守葭萌城張魯遣使誘之峻曰小人頭可得城不可得也

小劔故城在縣西南五十一里小劔城去大劔戍四十里連山絕險飛閣通衢故謂之劔閣道自縣西南踰小山入大劔口即秦使張儀司馬錯伐蜀所由路也亦謂之石牛道又有古道自縣東南經益昌戍又東南入劔州晉安縣界即鍾會伐蜀之路也

葭萌縣

上北至州一百一十五里

本漢葭萌縣地東晉于今縣南置晉安縣隋改為葭萌縣取漢舊縣名也



嘉陵江在縣城南

脢山縣

中下西北至州二百一十五里

本漢葭萌縣地後魏于今縣西南十五里置義城縣隋義寧二年改名義清縣天寶元年改為脢山以縣北三十里有可脢山為名

縣城置玄白崖山上武德四年築義清縣理焉惟三面有城皆臨絕險南面因險不更築城

景谷縣

中下西南至州六十六里

本漢白水縣地屬廣漢郡宋元嘉十七年氐人楊難當  
自稱大秦王進軍克葭萌獲晉壽太守申坦因分白水  
置平興縣屬之沙州隋開皇十八年改為景谷縣因縣  
北景谷為名大業二年廢沙州縣屬利州

縣城本平興城楊難當所築削山為城城三角中有一  
井傳豎眼所穿

木馬山在縣西南二十五里諸葛亮之出祁山也作木  
牛流馬以供運于此造作因以名焉

白水一名羌水經縣西一里

石門關在縣南十八里因山為阻昔諸葛亮鑿石為門  
因名之

鳳州河池上

開元戶三千八百四十九  
元和戶一千三百五十八

鄉二十二  
鄉一十五

禹貢梁州之域戰國時為秦地秦并天下為隴西郡地  
漢高帝分隴西郡置廣漢郡武帝分廣漢隴西郡置武  
都郡領縣九其屬有故道河池二縣今州即二縣之地

也三國時屬魏明帝太和三年其地沒蜀魏平蜀後復為雍州之地其地本氐羌所居後漢獻帝建安中有楊騰者為部落大帥騰子駒勇健多計略始徙居仇池至宋武帝封楊盛為武都王其子玄及難當亦相繼為王文帝元嘉十八年難當傾國南寇規有蜀土後魏太平真君二年招定仇池其年于此城立鎮太和元年置固道郡孝昌中以固道郡置南岐州廢帝三年改南岐州為鳳州因州境有鷲鷲山為名按成州同谷縣本是鳳

州西界縣南有鳳凰山因為州名隋大業三年改為河  
池郡武德元年復為鳳州

州境

東西四百八十里  
南北三百七十六里

八到

東北至上都六百里  
東北至東都一千四百六十里

東至興元府三百八十里

東北至興州一百三十里

東北至鳳翔府二百八十里

北至隴州四百二十里

貢賦

開元貢蠟一百斤  
賦布麻

元和貢蜜土布

管縣三

梁泉 兩當 河池

梁泉縣

中下郭下

開元戶一千八百一十八

鄉一十二

本漢故道縣地後魏太和元年于此置梁泉縣取縣西  
梁泉為名屬固道郡隋開皇三年罷郡縣屬鳳州皇朝

因之

武德元年析置黃  
花縣寶應元年省

三松山在縣南五里

故道水出陳倉縣之大散嶺西南流入故道川今州理  
即故道川也

迴車戍在縣西北六十里梁太清五年西魏遣雍州刺  
史達奚武為大都督及行臺楊寬率衆七萬由陳倉路  
取迴車戍入斜谷關出白馬道謂此也

兩當縣 中下東至州五十里

開元戶一千六十六 鄉五

本漢故道縣地屬武都郡漢高帝引兵從故道出襲雍

謂此也永嘉之後地沒氏羌縣名絕矣後魏變文為固  
于此置固道郡領兩當廣鄉二縣因縣界兩當水為名  
或云縣西界有兩山相當因取為名隋開皇罷郡縣屬  
鳳州皇朝因之

鷺鷥山在縣西二十里

尚婆水今名石磐水水多磐石因以為名俗語音訛故  
云尚婆川中有鳥羣飛二月從北向南八月從南還北  
音如簫管俗云伎兒鳥春來則種米秋去則種麥人常



以為農候

河池縣

中下東至州一百七十里

開元戶九百六十五

鄉五

本漢舊縣屬武都郡河池一名仇池按仇池山本名仇維山上有池似覆壺有瀑布其縣因山為名山在成州界去縣稍遠今縣所處謂之河池川故取以為名永嘉之後沒于氐羌縣名絕矣後魏于此置廣化郡廣化縣隋開皇三年罷郡縣屬鳳州仁壽元年改為河池縣復

漢舊名皇朝因之

故道水經縣城西去城三十步

河池戍在縣城中

髑髏堆在縣東北四十三里後魏討仇池于此大破其軍築為京觀俗號其地為髑髏堆

興州 順政上

開元戶二千四十五 鄉八  
元和戶九百五十四 鄉九

禹貢梁州之域戰國時為白馬氏之東境秦并天下屬

蜀郡漢武帝元鼎六年以白馬氏置武都郡今州即漢武都郡之沮縣也晉永嘉末氐人楊茂搜自號氐王據武都自後郡縣荒廢而茂搜子孫承嗣為氐王其後楊難當又據下辨自稱大秦王難當弟伯宜為茹盧王伯宜孫鼠分王武興按武興即今州理是也楊鼠既王武興又得武都河池二縣之地鼠子集始稱藩于魏後謀叛魏魏遂廢武興為藩鎮其年改鎮為東益州廢帝二年改東益州為興州因武興郡為名隋大業二年罷州

為順政郡武德元年復置興州按州城即古武興城也  
初蜀以其處當衝要遣蔣舒為武興督守之及鍾會伐  
蜀舒遂降魏即其處也城雖在平地甚牢實周迴五百  
許步惟開西北一門外有壘三面周匝

州境

東西二百八十六里  
南北一百九十里

八到

東北至上都九百五十里  
東北至東都一千八百一十里

東南至興元府二百五十里

南沿流至興元府三泉縣一百五十里

西至武州三百五十里

北至鳳州三百五十里

貢賦

開元貢賦

蠟六十斤  
布麻

硃砂

管縣三

順政 長舉 鳴水

順政縣

中下郭下

開元戶一千一百八十八

鄉四

本漢沮縣地後魏廢帝分置漢曲縣屬順政郡隋開皇三年罷郡以漢曲縣屬興州十八年改為順政縣皇朝因之

武興山在縣北百里多漆及黃檗

嘉陵水經縣南去縣百步

沮水出縣東北八十二里以其初出沮洳然故名為沮水

興城關在縣南五里

大城戍在縣東南四十九里

楊君神祠在縣西南二里嘉陵水南山上即楊難當神也土人祠之

長舉縣

中下南至州一百里

開元戶四百三十 鄉二

本漢沮縣地後魏于此分置長舉縣屬槃頭郡周武帝廢槃頭郡縣改屬落叢郡隋開皇三年罷郡縣屬興州皇朝因之

接溪山在縣西北五十三里出硃砂百姓採之

青泥嶺在縣西北五十三里接溪山東即今通路也懸崖萬仞山多雲雨行者屢逢泥淖故號為青泥嶺

嘉陵水去縣南十里

槃頭故城在縣南三里因水盤屈為名也

鳴水縣

中下東至州一百一十里

開元戶四百二十七

鄉二

本漢沮縣地也後魏宣武帝于此置落叢郡因落叢山為名又置鳴水縣因谷為名隋開皇三年罷郡縣屬興州皇朝因之

廚山在縣南三里極崇峻幽深多木蜜百姓資其利



落叢山縣西北十里出鐵

成州 同谷下

開元戶四千九百五  
案開元鄉數及元和戶鄉數並傳寫缺

禹貢梁州之域古西戎地也後為白馬氐國西南夷有  
冉駹以來什數白馬最大有山曰仇池地方百頃其地  
險固白馬氐據焉秦逐西羌置隴西郡秦末氐羌又侵  
據之元鼎六年平西南夷置武都郡今州界二郡之地  
晉宋間氐帥楊定楊難當竊據仇池自稱大秦王宋遣

將軍裴方明討平之後魏于此置仇池鎮理百頃岑上  
後又改為郡梁改為秦州齊廢帝改為成州隋大業三  
年改成州為漢陽郡武德元年復為成州本屬隴右道  
貞元五年節度使嚴震奏割屬山南道今于同谷縣西  
界泥公山上權置行成州

州境

東西三百九十三里  
南北三百九十四里

八到

東至上都一千里  
東至東都一千八百六十里

東至鳳州四百五十里  
東南取良恭縣路至宕州五百四十里

南至武州三百八十里  
東北至秦州一百八十里

貢賦

開元貢賦

蠟燭

鹿茸

防葵

狼毒

管縣三

上祿 同谷 長道

上祿縣

中郭下

本漢舊縣屬武都郡後魏改為階陵縣周武帝改為倉泉縣隋開皇三年罷郡縣屬成州大業三年改為上祿縣

仇池山在縣南八十里壁立百仞有自然樓櫓卻敵分  
置均調有如人功上有數萬人家一人守道萬夫莫向  
其池良沃有土可以煮鹽

案其池一作其地  
有土一作有工

楊氏故累

世據焉

雞頭山在縣東北二十里後漢將來歙從山道襲得略  
陽隗囂出其不意使將王孟將兵塞雞頭道即此也

州城即楊難當所築也

同谷縣

中下西北至州一百八十里

本漢下辨道也屬武都郡故氐白馬王國後魏宣武帝  
于此置廣業郡并白石縣恭帝改白石為同谷縣隋開  
皇三年罷郡以縣屬康州大業屬鳳州貞觀元年屬成  
州

仙掌山在縣南五里

下辨水一名甘泉縣東北七十里

長道縣

下南至州五十里

本漢上祿縣地後魏之天水郡也廢帝改為長道郡又

立漢陽縣屬焉隋開皇三年罷郡縣屬成州十八年改漢陽縣為長道縣

祁山在縣東十里蜀後主建興六年諸葛亮率軍攻祁山即此是也漢水經其南有諸葛亮壘壘之左右猶有豐草蓋亮之所植也

西漢水東北自秦州上封縣界流入

鹽井在縣東三十里水與岸齊鹽極甘美食之破氣

鹽官故城在縣東三十里在嵒冢西四十里相承營煮

味與海鹽同

鄴公營在縣西南三里武德元年行軍元帥鄴國公竇軌討薛舉餘黨營軍于此是也

文州 陰平下

開元戶一千七百六十九  
元和戶二百一十八

鄉九  
案鄉數傳寫缺

貞觀中屬隴右道

案前成州志云本屬隴右道貞元五年節度使嚴震奏割屬山

南道則此文州當亦同時改屬山南者文獻通考謂唐置文州屬劍南道蓋據通典所載開元時制與舊唐書所言永徽中改屬劍南道相合第參證新唐書之列山南西道採訪使及是志之列山南

則有所脫漏矣而是志不言  
永徽後屬劔南亦未完備

禹貢梁州之域戰國時氐羌據焉漢開西南夷置陰平

道

凡邑有蠻夷曰道

以統兵衆屬廣漢郡永平之後羌虜數反

遂置為郡後入于蜀屬雍州晉永嘉末太守王鑒以郡

降李雄自後氐羌據之不為正朔所頒故江右諸志並

不錄也至後魏平蜀始于此置文州理陰平郡隋大業

二年罷州縣屬武都隋末又陷寇賊至武德元年隴蜀

平復為文州大厯十四年西戎犯邊刺史拔城南走建



中三年以舊城在平地窄小難守遂移于故城東四里  
高原上即今州理也

州境

東西一百八十八里  
南北二百四十里

八到

東北至上都一千四百五十里  
東北至東都二千三百一十里

東取山路至龍州三百六十里  
東南至利州四百九十里

西南至扶州一百六十里  
北至武州二百五十里

貢賦

開元貢麝香蠟燭  
賦布麻

## 管縣二

曲水 長松

曲水縣 中下郭下

本漢之陰平道也屬廣漢郡晉為陰平縣屬陰平郡永嘉末地陷李雄縣遂廢後魏平蜀置曲水縣屬陰平郡隋開皇三年罷郡縣屬文州皇朝因之

大白山在縣南二百五十三里其山巖谷高深常多霜雪春夏不消俗因名焉

太白泉一名羌水經縣北去縣一里

鄧艾故城在縣東七里魏景元四年鄧艾伐蜀上言今敵既摧折宜遂乘之從陰平由斜徑經漢德陽亭出劔閣西百里去成都三百餘里奇兵衝其腹心破之必矣遂自陰平道伐蜀蓋此時所築城也

姜維故城在縣東七里後主令維于此築城與鄧艾相守

長松縣 中下西南至州七十里

開元戶四百九十四 鄉三

後魏之建昌縣也屬蘆北郡隋開皇初郡廢十八年改為長松縣屬文州大業三年罷州縣屬武都郡武德元年復改屬文州

天魏山在縣北三十一里

蘆北故城在縣東五十二里因葭蘆鎮為名也

扶州 同昌下

開元戶二千一百九十五 鄉十四

貞觀中屬隴右道

案唐書地理志扶州列山南西道與文州同舊唐書謂永徽後

由隴右改為劍南道文獻通考謂乾元後沒吐谷  
渾大中二年收復屬劍南道據通攷則大中後元  
和三十餘年唐書新舊皆有脫漏據舊唐書則永  
徽先元和百五十餘年而是志不言曾屬劍南亦  
未完

禹貢梁州之域古西戎之地自秦漢迄魏晉屬蕃夷無

所建置後魏討定陰平鄧至羌立為寧州分置昌寧案通

典及新舊唐書並作鄧寧惟隋書作昌寧與此合帖夷等郡後改為鄧州因鄧

至羌為名也隋開皇七年改為扶州大業二年改為同

昌郡武德元年重置扶州

州境

東西三百九十里  
南北四百一十九里

八到

東北至上都一千六百里  
東北至東都二千四百六十里

東南至龍州六百里

東北至文州一百六十里

西南至松州驛路三百三十里

西北至故芳州驛路三百三十里

北至宕州四百里

貢賦

開元貢麝香 當歸 芎藭  
賦布 麻

管縣四

同昌 帖夷 鉗川 尚安

同昌縣 中下郭下

開元戶六百一十九 鄉四

本後魏之舊縣也廢帝前元年置屬昌寧郡隋開皇初改屬鄧州後屬扶州皇朝因之

鄧至山在縣東二十五里

白水經縣西去縣百步

鄧至故城在縣南三里

帖夷縣 中下西至州一百里

開元戶五百六十六 鄉四

本後魏廢帝元年置屬帖夷郡隋開皇三年屬鄧州七年改屬扶州皇朝因之

白水經縣南去縣百步

安昌故城在縣東北三十二里後魏廢帝遣寧同宇文

昶平彌

案此數字似有脫誤

陰平鄧至二蕃立寧州修築故城

鉗川縣

中下東至州一百三十里

開元戶四百一十八 鄉三



後魏廢帝二年置因山為名屬尚安郡隋開皇三年屬鄧州七年改屬扶州皇朝因之

羅夷山在縣東南五十八里

白水經縣南去縣二十八里

鉗川神祠去縣西北十里水旱人祈請焉

尚安縣 中下東南至州一百一十里

開元戶四百一十九 鄉三 案前自河東道之太原至五臺三十九縣崞至馬邑六縣上黨至潞城四縣河北道之河內至獲嘉五縣山南道之梁泉至鳴水六縣長松至尚安五縣各載開元戶鄉

數其間二百餘縣同前闕內河南及後江南  
劔南嶺南隴右諸道所隸各縣並傳寫遺缺

後魏恭帝後三年置屬武進郡隋開皇三年屬鄧州七  
年改屬扶州皇朝因之

素嶺山在縣西北百六十八里

黑水源出素嶺山經縣西北三十步

元和郡縣志卷二十五

欽定四庫全書

元和郡縣志卷二十六

唐 李吉甫 撰

江南道

一 案唐書地理志江南道之前有淮南道首揚州即廣陵郡其縣曰江都江陽六

合海陵高郵揚子天長次楚州即淮陰郡其縣曰山陽鹽城寶應淮陰次滁州即永陽郡其縣曰清流全椒永陽次和州即歷陽郡其縣曰歷陽烏江含山次壽州即壽春郡其縣曰壽春安豐盛唐霍丘霍山次廬州即廬江郡其縣曰合肥曰慎曰巢曰廬江舒城次舒州即同安郡其縣曰懷寧宿松望江太湖桐城又其次為光蘄安黃申五州是志以申光二州列河南道蔡州之後安黃蘄三州列

江南道鄂沔二州之後與唐書方鎮表元和初年  
蔡州節度使鄂岳觀察使所領州相合而揚楚滁  
和壽廬舒七州則其時同仍隸淮南節度  
使者當別有淮南道志文而傳寫缺佚

潤州

丹陽上

開元戶九萬一千六百三十五  
鄉一百  
元和戶五萬五千四百  
鄉八十

墾田六千七百二十七頃  
案前各府州據此潤  
州類推其戶鄉數及都管戶數後皆有墾田數而  
傳寫  
缺佚

今為浙西觀察使理所

管潤州常州蘇州杭州湖  
州睦州  
管縣三十七

都管戶三十一萬三千七百七十二  
墾田五萬七千九百三十二頃

本春秋吳之朱方邑始皇改為丹徒漢初為荊國劉賈所封後漢獻帝建安十四年孫權自吳理丹徒號曰京城今州是也十六年遷都建業以此為京口鎮按州理或古名京城說者以為荊王劉賈嘗都之或曰孫權居之故名京城今按荊字既不同又孫權未稱尊號已名為京則兩說皆非也按京者人力所為絕高丘也亦有非人力所為者

案亦有一人  
力所為者若公孫瓚所築  
作亦云

易京是也非人力所為者滎陽京索是也今地名徐陵

即此京非人力所為也京上郡城城前浦口即是京口  
吳志曰漢獻帝興平二年長沙桓王孫策創業江東使  
將軍孫何領兵屯京地是也吳志又云魏將臧霸以輕  
船五百敢死萬人襲徐陵攻燒城塹即吳時或稱京城  
或稱徐陵或稱丹徒其實一也晉永嘉亂後幽冀青并  
兗五州流人過江者多僑居此處吳晉以後皆為重鎮  
晉咸和中郝鑒自廣陵鎮於此為僑徐州所理昇平二  
年徐州刺史北鎮下邳京口常有留局後徐州寄理建

業又為南充州後又為南徐州隋開皇九年賀若弼自  
廣陵來襲陷之遂滅陳廢南徐州改為延陵鎮十五年  
罷鎮置潤州城東有潤浦口因以名隋氏喪亂杜伏威  
竊據其地武德三年伏威歸化六年輔公祏叛復據其  
地七年平公祏依前置州其城吳初築也晉王恭為刺  
史改創西南樓名萬歲樓西北樓名芙蓉樓

州境

東西三百八里  
南北一百九十里

八到

西北至上都二千六百七十里  
西北至東都一千八百一十里

東南至常州一百七十里

北渡江至揚州七十里

正北微西至宣州四百里

貢賦

開元貢

雜藥

紋綾

賦

絲

紵

布

自貞元以後觀察使王偉李錡相繼兼領鹽鐵使  
務其進奉與揚州益州相比元和以後稍革之

管縣六

丹徒 丹陽

金壇

延陵

上元

句容

丹徒縣

望郭下

本朱方地後名谷陽春秋魯襄二十八年齊慶封奔吳



吳興之朱方聚族而居之富于其舊後楚靈王使屈申  
圍慶封於朱方克之盡滅其族即此地初秦以其地有  
王氣始皇遣赭衣徒三千人鑿破長隴故名丹徒

北固山在縣北一里下臨長江其勢險固因以為名蔡  
謨謝安作鎮竝於山上作府庫儲軍實宋高祖云作鎮  
作固誠有其緒然北望海口實為壯觀以理而推固宜  
為顧江今濶一十八里春秋朔望有奔濤魏文帝東征  
孫氏臨江歎曰固天所以限南北也

蒜山在縣西九里山臨江絕壁晉安帝時海賊孫恩至  
丹徒戰卒十萬率衆登山鼓譟動地引陣南出欲向京  
城時宋武帝衆無一旅率所領橫擊大破之山多澤蒜  
因以為名

互父山在縣西北十里晉破苻堅獲互賊置此山下因  
以為名今土俗亦謂之金山

獸窟山一名招隱山在縣西南九里即隱士戴顓之所  
居也

東浦亦謂之潤浦在縣東二里北流入江隋置潤州取此浦為名也

永興寧陵在縣東南三十五里宋武帝追尊曰孝皇帝諱翹初仕郡為功曹

丹陽縣 望西北至州六十四里

本舊雲陽縣秦時望氣者云有王氣故鑿之以敗其勢截其直道使之阿曲故曰曲阿武德五年曾於縣置簡州八年廢天寶元年改為丹陽縣

劉繇城在縣西南二百四十步漢末繇為揚州刺史揚州舊理壽春是時已為袁術所據故繇來建城號令江南衆數萬人後孫策東略繇奔豫章

虔亭壘在縣東四十七里本蘇峻將管商攻略晉陵郝道微以此地東據要路北當武進故遣督護李閔築此拒之今置埭

練湖在縣北百二十步周迴四十里晉時陳敏為亂據有江東務修耕績令弟詣過馬林溪以溉雲陽亦謂之

練塘溉田數百頃

新豐湖在縣東北三十里晉元帝大興四年晉陵內史張闓所立舊晉陵地廣人稀且少陂渠田多惡穢闓創湖成溉灌之利初以勞役免官後追紀其功超為大司農

南齊宣帝休安陵在縣北二十八里高帝父也追尊為宣皇帝

高帝道成泰安陵在縣缺三十一里

武帝蹟景安陵在縣東二十二里

景帝道生永安陵在縣東北二十六里明帝父也追

尊為景皇帝

明帝鸞興安陵在縣東北二十四里

梁文帝順之建陵在縣

缺

二十五里武帝父也追尊為

文皇帝

武帝衍修陵在縣東三十一里貞觀十一年詔令百步

禁樵採

簡文帝網莊陵在縣東二十七里

金壇縣

緊西北至州一百四十里

本漢曲阿縣地隋於此置金山府隋末亂離鄉人自立為金山縣武德八年廢垂拱二年又置縣以婺州有金山改名金壇

延陵縣

緊東至州一百里

晉太康二年分曲阿之延陵鄉置延陵縣蓋因季子以立名也又漢地理志季子所居在今毗陵本名延陵至

漢始改然今縣北見有其祠或當時采地所及其地亦  
曰連陵

茅山在縣西南三十五里三茅得道之所事具仙經不  
錄

古神亭在縣西北二十五里初孫策與太史慈過於神  
亭即此地也吳志曰太史慈渡江到曲阿見劉繇會孫  
策至繇使慈覘輕重獨與一騎卒過於神亭策從騎十  
二皆韓當宋謙黃蓋輩也慈便前鬪策刺慈馬得慈項



上手戰慈亦得策兜鍪會兩家兵騎來赴遂各解散後  
策獲慈解縛捉手曰寧識神亭時耶是時卿得我如何  
慈曰未可量也策乃大笑

上元縣

緊東北至州一百八十里

本金陵地秦始皇時望氣者云五百年後金陵有都邑  
之氣故始皇東遊以厭之改其地曰秣陵塹北山以絕  
其勢及孫權之稱號自謂當之孫盛以為始皇逮於孫  
氏四百三十七載攷其厯數猶為未及晉之渡江乃五

百二十六年遂定都馬隋開皇九年平陳於石頭城置  
蔣州以江寧縣屬焉武德三年杜伏威歸化改江寧為  
歸化縣九年改為白下縣屬潤州貞觀九年又改白下  
為江寧至德二年於縣置江寧郡乾元元年改為昇州  
兼置浙西節度使上元二年廢昇州仍改江寧為上元  
縣

鍾山在縣東北一十八里

案東北各本訛作西北今據次條覆舟山在西足訂正

按輿地志古金陵山也邑縣之名皆由此而立吳大帝

時蔣子文發神異於此封之為蔣侯改山曰蔣山宋復名鍾山梁武帝於西麓置愛敬寺江表上已常遊於此為衆山之傑

覆舟山在縣東北十里鍾山西足也形如覆舟故名宋元嘉中改名玄武山以為樂遊苑初桓玄作亂使卞範之屯覆舟山西粟餘二萬宋高祖率義師食畢棄其餘糧躬先士卒以擊之範之等一時土崩

牛頭山在縣南四十里山有二峯東西相對名為雙闕

晉氏初過江無闕王導指山鑿兩峯即此名天闕山

方山在縣東南七十里秦鑿金陵以斷其勢方石山垵

居偽切是所斷之處也

三山在縣西南五十里晉王濬伐吳宿於牛渚部分明

日前至三山即此也

四望山在縣西北八里晉溫嶠伐蘇峻於四望山築壘

以逼賊是也

蔡州在縣西十二里江中晉盧循作亂戰士十餘萬舟

艦數百里連旗而下宋高祖登石頭以望循軍初循引  
向新亭公顧左右失色既而迴泊蔡洲公曰此成擒耳  
俄而循大敗而走

淮水源出縣南華山在丹陽湖孰兩縣界西北流經秣  
陵建康二縣之間入於江初王敦構亂王導憂將覆族  
使郭璞筮之璞曰淮水絕王氏滅即此淮也

玄武湖在縣北十里周迴二十五里

婁湖縣東南五里吳張昭所創溉田數十頃周迴七里

昭封婁侯故謂之婁湖宋時為苑

晉故臺城在縣東北五里成帝時蘇峻作亂焚燒宮室  
都盡溫嶠以下咸議遷都惟王導固爭不許咸和六年  
使王彬營造七年帝遷於新宮即此城也

揚州故理在縣東百步後漢末又理壽春劉繇為揚州  
刺史始移理曲阿吳長沙桓王孫策定江東置揚州於  
建業其州廨王敦及王導所創也後會稽王道子於東  
府城領州故亦號此為西州及隋平陳又於石頭置蔣

州移揚州於江北之江都焉

丹陽郡故城在縣東南五里初為丹陽內史後改為尹  
石頭城在縣西四里即楚之金陵城也吳改為石頭城  
建安十六年吳大帝修築以貯財寶軍器有戌吳都賦  
云戎車盈於石城是也諸葛亮云鍾山龍盤石城虎踞  
言其形之險固也

秣陵故縣在縣東南四里本金陵地也秦改為秣陵  
湖熟故縣在縣東南七十里

越城在縣南六里本東甌越王所立也吳王濞敗先趨此城後保丹徒郭璞行於途中贈白衣人袴褶亦此城也

建康故城在縣南三里建安中改秣陵為建業晉復為秣陵武帝又分秣陵水北為建業避愍帝諱改名建康東府城在縣東七里其地四則簡文帝為會稽王時邸第東則丞相會稽王道子府謝安薨道子代領揚州仍前府舍故稱為東府而謂揚州廨為西州謝惠連祭冥



漢君文即因修此府之城牆所為也

輔公柘城在縣東七里其地本齊文惠太子苑地也公柘構亂築以為城其年公柘平城遂毀廢

賀若弼壘在縣北二十里隋平陳弼過江於蔣山龍尾築壘

韓擒虎壘在縣西四里隋平陳樹碑其文薛道衡之詞  
武德七年趙郡王孝恭平輔公柘樹碑紀功與此碑相  
對李百藥之詞

吳大帝蔣陵在縣北二十二里

晉元帝睿建平陵明帝紹武平陵成帝衍興平陵並在縣北六里雞籠山

康帝岳宗平陵在縣東北二十里蔣山西南

哀帝丕安平陵在縣北六里雞籠山南

簡文帝昱高平陵孝武帝昌明隆平陵安帝德宗休平

陵恭帝德文沖平陵並在縣東北二十里蔣山西南

宋武帝劉裕初寧陵文帝義隆長寧陵並在縣東北二

十二里蔣山東南

孝武帝駿景寧陵在縣西南四十里巖山

明帝或高寧陵在縣北十九里幕府山東南

陳武帝霸先萬安陵在縣東三十八里方山西北貞觀

十一年詔百步內禁樵採

文帝舊永寧陵在縣東北四十里蔣山東北

宣帝項顯寧陵在縣南四十里牛頭山西北

梁昭明太子安陵在縣東北五十四里查礪山

晉王導墓在縣西北十四里幕府山西

謝安墓在縣東南十里石子岡北

句容縣

緊東北至州二百里

漢舊縣也晉元帝興於江左為畿內第二品縣縣有茅

山本名句曲以山形似已字句曲有所容故號句容

赤山湖在縣南三十五里

茅山在縣東南六十里

竹里山在縣北六十里王塗所經塗甚傾險行者號為

翻車峴山間有長澗高下深阻舊說云似洛陽金谷宋武帝初起自京口至江乘破桓玄將吳甫之於竹里移檄京師卽此處也

銅冶山在縣北六十五里山出銅鉛歷代採鑄

常州 晉陵緊

開元戶九萬六千四百七十五 鄉一百八十七  
元和戶五萬四千七百六十七 案鄉數傳寫缺

禹貢揚州之地春秋時屬吳延陵季子之采邑漢改曰毗陵晉東海王越謫於毗陵元帝以避諱改為晉陵郡

宋齊因之隋開皇九年平陳廢郡於常熟縣置常州因  
縣為名後割常熟縣入蘇州移常州理於晉陵縣隋亂  
陷於寇境武德七年平仍舊置常州

州境

東西二百一十二里  
南北二百九十里

八到

西北至上都二千八百四十五里  
西北至東都一千九百八十里

東南至蘇州一百九十里  
正南至微西至湖州私路三百里

西南至古宣州五百里  
西北至潤州一百七十里

貢賦

開元貢  
細紵  
紵布  
紅紫二色縣布  
紙六十張

管縣五

晉陵 武進 江陰 無錫 義興

晉陵縣 望郭下

春秋時延陵漢之毗陵也後與郡俱改為晉陵季札所居也墓在本縣北七十里申浦之西

武進縣 望郭下

吳大帝改丹徒為武進晉武帝復改武進曰丹徒曲阿

案此曲阿二字疑上下有缺文攷後漢書郡國志丹徒曲阿本為吳郡十三城之二晉書地理志則丹徒曲阿

武進為毗陵郡七縣之三且注云丹徒故別置武進縣  
宋方曲阿故雲陽是各為一縣未嘗併合

於丹陽縣東五十里梁武帝改武進為蘭陵入晉陵垂  
拱二年又析晉陵西界立武進縣於州理

江陰縣 緊東南至州五十里

本漢毗陵縣之漑陽鄉晉太康二年置漑陽縣梁敬帝  
置江陰縣郡隋開皇九年罷郡縣屬常州

無錫縣 望西北至州九十六里

漢舊縣也東三十九里有梅里山吳太伯葬處



義興縣

緊北至州一百二十里

本漢陽羨縣故城在荆溪南晉惠帝時妖賊石水寇亂  
揚土縣人周玘創義討水割吳興之陽羨并長城縣之  
北鄉為義興郡以表玘功隋開皇九年平陳廢郡為義  
興縣

荆溪是周處斬蛟處

蘇州

吳郡緊

開元戶六萬八千九十三  
元和戶一十萬八百八

鄉一百一十八  
案鄉數傳偶缺

禹貢揚州之地周時為吳國太伯初置城在今吳縣西北五十里至闔閭遷都於此後為越所并楚滅越而封黃歇於吳秦置會稽郡二十六縣於吳項羽初起殺會稽太守殷通即此也漢亦為會稽郡後漢順帝永建四年陽羨令周喜山陰令殷重上書求分為二郡遂割浙江以東為會稽浙江以西為吳郡孫氏創業亦肇迹於此歷晉至陳不改常為吳郡與吳興丹陽號為三吳隋開皇九年平陳改為蘇州因姑蘇山為名山在州西四

十里其上閭閻起臺外郭城云是伍胥所築周迴四十

七里

州境

東西四百四十一里  
南北四百九十八里

八到

西北至工部三千三十里  
西北至東都二千一百七十里

南至杭州三百七十里  
正南微西至湖州二百一十里

東北至海三百三十里  
西北至常州一百九十里

貢賦

開元貢  
賦  
白石脂  
蛇牀子  
紵布

元和貢  
絲葛十匹  
白石脂三十斤

蛇牀子三升

管縣七

吳 長洲 嘉興 海鹽 常熟 崑山

華亭

吳縣 望郭下

本吳國闔閭所都秦置縣

太湖在縣西南五十里禹貢謂之震澤周禮謂之具區  
湖中有山名洞庭山

虎丘山在縣西北八里吳越春秋云闔閭葬於此秦皇

鑿其珍異莫知所在孫權穿之亦無所得其鑿處今成  
深澗

松江在縣南五十里經崑山入海左傳云越伐吳軍於  
笠澤即此江

長洲縣

望郭下

本萬歲通天元年析吳縣置取長洲苑為名苑在縣西  
南七十里

嘉興縣

望北至州一百四十七里

本春秋時長水縣秦為由拳縣漢因之吳時有嘉禾生改名禾興縣後以孫皓父名改為嘉興縣也

海鹽縣

上西北至州二百二十七里

本秦縣漢因之其後縣城陷為柘湖移於武原鄉後又陷為當湖移置山旁隋開皇九年廢縣北屬杭州武德七年地入嘉興開元五年刺史張庭珪又奏置

常熟縣

緊南至州一百里

本漢吳縣地梁大同六年置常熟縣武德七年移理海

鹽虞城今縣是也

崑山縣

緊西至州八十里

本秦漢婁縣其城吳子壽夢所築梁分置信義縣又分信義置崑山縣因縣有崑山故取名焉

華亭縣

上西至州二百七十里

天寶十年吳都太守趙居貞奏割崑山嘉興海鹽三縣置

華亭谷在縣西三十五里陸遜陸抗宅在其側遜封華

亭侯陸機云華亭鶴唳此地是也

杭州餘杭上

開元戶八萬四千二百五十二  
元和戶五萬一千二百七十六

鄉一百八十八  
案鄉數傳寫缺

禹貢揚州之域春秋時為吳越二國之境其地本名錢塘史記云秦始皇東遊至錢塘臨浙江是也漢屬會稽

吳志注云西部都尉理所陳禎明中置錢塘郡隋平陳廢郡為州

州境

東西五百五十四里  
南北八十九里



八到

西北至上都三千四百里  
西北至東都二十五百四十里

東南取浙江至越州一百三十里

西南至睦州三百一十五里

西至歙州四百七十里

西北至宣州四百九十六里

北至蘇州三百七十里

東北至浙江入海處約一百里

貢賦

間元貢  
賦  
紆布  
黃藤紙  
橘  
黃連  
鮮綾  
紋紗

元和貢  
白編綾一十二匹

管縣八

錢塘  
餘杭  
臨安  
富陽  
於潛  
鹽官

新城 唐山

錢塘縣

緊郭

本漢舊縣也錢塘記云昔州境逼近海縣理靈隱山下  
今餘址猶存郡議曹華信乃立塘以防海水募有能致  
土石者即與錢及塘成縣境蒙利乃還理此地於是改  
為錢塘按華信漢時為郡議曹據史記始皇至錢塘臨  
浙江秦時已有此名疑所說為謬隋平陳以後縣頻遷  
置貞觀四年定於今所

靈隱山在州西北一十七里

界石山在州西南四十九里

浙江在縣南一十二里莊子云浙河即謂浙江蓋取其曲折為名江源自歙州界東北流經界石山又東北經州理北又東北流入於海江濤每日晝夜再上常以月十日二十五日最小月三日十八日極大小則水漸漲不過數尺大則濤湧高至數丈每年八月十八日數百里士女共觀舟人漁子泝潮觸浪謂之弄濤

餘杭縣

緊東南至州七十里

本吳地吳興記云秦始皇三十七年將上會稽塗出此地因立為縣捨舟航於此仍以為名

由拳山晉隱士郭文舉所居旁有由拳村出好藤紙

臨安縣

緊東南至州一百二十八里

本吳大帝分餘杭縣立臨水縣晉改為臨安隋亂廢置無準垂拱四年巡撫使狄仁傑復奏置

富陽縣

緊東北至州七十三里

本漢富春縣屬會稽郡晉孝武帝太元中避鄭太后諱改春為陽吳孫堅父子即此縣人縣有王洲出橘為江東之最今見進供

湖洑山在縣西南五十里甚幽邃重疊險遠每時有擾攘人皆逃避於此山

於潛縣

緊東至州二百里

本漢舊縣也縣西有潛山因以為名舊潛字無水至隋加水馬武德七年置潛州領於潛臨水二縣八年廢州

縣屬杭州

天目山在縣理北六十里有兩峯峯頂各一池左右相對名曰天目

鹽官縣 上東南至州一百三十里

本漢舊縣有鹽官吳志云孫權為將軍陸遜始仕幕府出為屯田都尉即此地也武德七年省入錢塘縣貞觀四年復置

海水在縣南七里

臨平湖在縣西五十里溉田三百餘頃

新城縣

上東北至州一百三十二里

本漢富春縣地永淳元年分富春西境置

唐山縣

中東至州二百四十八里

漢於潛縣地萬歲通天元年置武隆縣神龍元年改為

唐山縣

湖州吳興上

開元戶六萬一千一百三十三  
元和戶四萬三千四百六十七

鄉一百二十二  
案鄉數傳寫缺

禹貢揚州之域防風氏之國秦始皇徙越人於此吳歸  
命侯置吳興郡梁紹泰初改吳興郡為震州蓋取震澤  
為名陳初罷震州復為吳興郡隋平陳廢吳興郡仁壽  
二年於此置湖州

州境

東西三百八里  
南北二百一十三里

八到

西北至上都三千二百四十里  
西北至東都二千二百四十里

東至杭州私路一百九十里

東北至蘇州二百一十里

東北至常州私路三百里

正西微北至宣州三百七十里



貢賦

開元貢賦

絲布

糙

杭米

紵布

元和貢

布三十三端

管縣五

烏程 長城 安吉 武康 德清

烏程縣 望郭下

本秦舊縣越絕云始皇至會稽徙於越之人於烏程吳興記云吳景帝封孫皓為烏程侯及皓即位改葬父和于此遂立為吳興郡

雪溪水一名大溪水一名茗溪水西南自長城安吉兩縣東北流至州南與餘不溪水苧溪水合又流入于太湖在州北三十五里

吳興塘太守沈攸之所建灌田二千餘頃

長城縣緊東南至州七十里

本漢烏程縣地晉武帝太康三年分其地置長城縣昔闔閭使弟夫概居此築城狹而長因以為名

顧山縣西北四十二里貞元以後每歲以進奉顧山紫

筍茶役工三萬人累月方畢

若溪水釀酒甚醲俗稱若下酒

安吉縣

上東北至州一百四十里

本漢故鄣縣地漢靈帝中平二年張角作亂荆揚尤甚  
惟此郡守險阻固漢朝嘉之故分立為縣

武康縣

上東北至州一百五里

本漢烏程縣不鄉之地漢末童謡云天子當興于東南  
三餘之間故吳大帝改會稽之餘暨為永興而分餘不

鄉置永安縣屬吳興晉平吳改為武康

封山在縣東南十八里即家語云封嵎之山防風氏之國也

德清縣 上北至州一百五里

天授二年析武康鄉置武原縣景雲二年改為臨溪縣以臨餘不溪也天寶元年又改為德清縣

睦州 新安上

開元戶五萬五千五百一十六  
元和戶九千五百一十四  
案開元元和鄉數傳寫缺

禹貢揚州之域春秋時迭入吳越秦屬丹陽郡為歙縣  
後漢建安十三年吳大帝遣中郎將賀齊討歙縣山賊  
平定分歙為始新新安黎陽休陽四縣與歙黟凡六縣  
立新都郡理始新縣晉武帝太康元年改新都為新安  
郡隋平陳廢新安郡析新安縣置睦州後又改為遂安  
郡隋氏喪亂陷於寇賊武德四年討平汪華改為州取  
俗阜人和內外輯睦為義萬歲通天二年又自新安東  
移一百六十五里理建德即今州理是

州境

東西四百二十里  
南北三百一十一里

八到

西北至上都三千七百一十五里  
西北至東都二千八百五十五里

西北至衛州二百八十一里

西北至鄆州三百七十里

東南至婺州一百六十里

貢賦

開元貢  
交梭 石炭  
絲 紵布

元和貢  
交梭二匹 竹簞

管縣六

建德 桐廬 遂安 清溪 分水 壽昌

建德縣 上郭下

本漢富春縣地吳黃武四年分置建德縣隋大業末改為鎮武德四年復改為建德縣

浙江在州南十里又有東陽江東南自婺州界來至州南注浙江

七里瀨在縣東北十里

桐廬縣 緊西南至州一百五里

本漢富春縣之桐溪鄉黃武四年分置桐廬縣以居桐

溪地因名

浙江在縣南一百四十步

桐廬江源出杭州於潛縣界天目山南流至縣東一里入浙江

嚴子陵釣臺在縣西三十里浙江北岸也

遂安縣

上東北至州一百九十里

本漢歙縣地吳大帝使賀齊平黟歙于縣之南鄉安定里置新安縣晉武太康元年改為遂安



白石山在縣西七十里其山出白石英貢因以為名

清溪縣

上東至州一百六十五里

黃武元年分歙縣東鄉置始新縣晉改為雉山以縣南有雉山因名之隋開皇九年併為新安縣仁壽中復為雉山開元二年改為還淳今改為清溪

新安江自歙州黟縣界流入縣東流入浙江

分水縣

上東北至州一百八十五里

本桐廬之西境武德四年置七年省如意元年改置盛


武縣神龍元年復改為分水

壽昌縣

中東北至州一百一十里

本漢富春縣地吳分立新昌晉太康元年改為壽昌皇

朝因之



元和郡縣志卷二十六